

Pravosudna Komisija Brčko distrikta Bosne i Hercegovine, na osnovu člana 14. stav (1) tačka n) Zakona o pravosudnoj komisiji Brčko distrikta BiH («Službeni glasnik Brčko distrikta BiH», broj 19/07, 20/07 i 2/08) i člana 197. stav (2) Zakona o zaštiti i postupanju sa djecom i maloljetnicima u krivičnom postupku („Službeni glasnik Brčko distrikta BiH“ broj 44/11), na sjednici održanoj 29.10.2012. godine usvojila je sledeći

## **P R O G R A M**

### **EDUKACIJE O STICANJU POSEBNIH ZNANJA I KONTINUIRANOM STRUČNOM OSPOSOBLJAVANJU I USAVRŠAVANJU LICA KOJA RADE NA POSLOVIMA PRESTUPNIŠTVA MLADIH I KRIVIČNOPRAVNE ZAŠTITE DJECE I MALOLJETNIKA**

#### **DIO PRVI – OPŠTE ODREDBE**

##### **Član 1.**

##### **(Predmet Programa edukacije)**

Ovim programom utvrđuju se tematski ciklusi koji se odnose na stručno usavršavanje lica koja rade na poslovima prestupništva mladih i krivičnopravne zaštite djece i maloljetnika (obavezna edukacija), odnosno ovlaštenih službenih lica, socijalnih radnika, medijatora, advokata i radnika zaposlenih u ustanovama i zavodima u smislu njihove specijalizacije za postupanje sa maloljetnim učiniocima krivičnih djela, kao i za njihovo postupanje sa djecom i maloljetnim licima kada se pojavljuju kao oštećeni u krivičnom postupku.

#### **DIO DRUGI - PROGRAM EDUKACIJE**

##### **Član 2.**

##### **(Sadržaj Programa edukacije)**

Program edukacije obuhvata slijedeće tematske cikluse za stručno usavršavanje:

##### **a) I ciklus:**

1) Etiologija i fenomenologija maloljetničke delikvencije,

2) Maloljetničko materijalno krivično pravo:

- sistem zakonskih propisa kojima se određuje pojam, organizacija i nadležnost organa maloljetničkog krivičnog pravosuđa,
- sistem krivičnih sankcija za maloljetnike,
- alternativne mjere,

3) Maloljetničko procesno krivično pravo:

- sistem zakonskih propisa kojima se određuje pojam, organizacija i nadležnost organa maloljetničkog krivičnog pravosuđa,
- pokretanje i vođenje krivičnog postupka prema maloljetnim učiniocima krivičnih djela,
- tok prvostepenog postupka prema maloljetnim učiniocima krivičnih djela,
- postupak po pravnim lijekovima prema maloljetnim učiniocima krivičnih djela,

4) Maloljetničko izvršno krivično pravo:

- sistem zakonskih i podzakonskih propisa kojima se određuju organizacija, nadležnost i uloga državnih organa u oblasti maloljetničke delikvencije,
- postupak izvršenja izrečenih maloljetničkih krivičnih sankcija i drugih alternativnih mjera koje se primjenjuju prema maloljetnim učiniocima krivičnih djela;

## **b) II ciklus**

1) podzakonski akti:

- pravilnik o primjeni posebnih obaveza prema maloljetnim učiniocima iz člana 35. stav (9) Zakona o zaštiti i postupanju sa djecom i maloljetnicima u krivičnom postupku (u daljem tekstu: Zakon),
- pravilnik o primjeni vaspitnih preporuka iz člana 124. stav (2) Zakona,
- pravilnik o disciplinskoj odgovornosti iz člana 153. stav (1) Zakona,
- program edukacije iz člana 197. stav (2) Zakona,

- pravilnik o primjeni mjere policijskog upozorenja iz člana 124. stav (1) Zakona,
- 2) primjena Zakona u praksi i zaštita djece žrtava i njihova resocijalizacija – praktični primjeri;

**c) III ciklus:**

1) međunarodnopravni dokumenti, odnosno standardi u zaštiti maloljetnika:

- Univezalna deklaracija o ljudskim pravima (1948),
- Sporazum Ujedinjenih nacija o građanskim i političkim pravima (1986),
- Evropska konvencija za zaštitu ljudskih prava i osnovnih sloboda (1950),
- Konvencija Ujedinjenih nacija o pravima djeteta iz 1989. godine,
- Standardna minimalna pravila Ujedinjenih nacija za maloljetničko pravosuđe – tzv. Pekinška pravila iz 1985. godine,
- Smjernice Ujedinjenih nacija za prevenciju maloljetničke delikvencije – tzv. Rijadske smjernice iz 1990. godine,
- Pravila Ujedinjenih nacija o zaštiti maloljetnika lišenih slobode (od neosnovanog lišenja slobode) – tzv. Havanska pravila iz 1990. godine,
- Standardna minimalna pravila Ujedinjenih nacija za mjere alternativne institucionalnom tretmanu – tzv. Tokijska pravila iz 1990. godine,
- Evropska pravila o društvenim sankcijama i mjerama za sprovođenje maloljetničkog krivičnog pravosuđa – tzv. Bečka pravila iz 1997. godine,
- Preporuka generalnog sekretara Ujedinjenih nacija – Opšti pristup Ujedinjenih nacija maloljetničkom pravosuđu iz 2008. godine,
- Rezolucija Ekonomskog i socijalnog savjeta Ujedinjenih nacija o podršci pokušajima nacionalne reforme maloljetničkog pravosuđa posebno kroz tehničku pomoć i poboljšanu sistemsku saradnju, broj 2007/23 iz 2007. godine,
- Preporuka broj P-(87)-20 o društvenom reagovanju na delikvenciju maloljetnika (1987),
- Preporuka P-(88)-6 o društvenom reagovanju na delikventno ponašanje mladih koji potiču iz migrantskih porodica (1989),
- Evropska pravila za sankcije i mjere zajednice CE-P-(92)-16,

- Preporuka broj (2003)-20 o novim načinima tretiranja maloljetničkog prestupništva i o ulozi maloljetničkog pravosuđa (2003),
- Rezolucija XVII kongresa Međunarodnog udruženja za krivično pravo, Peking, 2004. godine,
- Protokol Generalne skupštine Ujedinjenih nacija za uključivanje djece u oružane sukobe iz 2008. godine,
- Protokol Generalne skupštine Ujedinjenih nacija o trgovini djecom, dječijoj prostituciji i dječijoj pornografiji iz 2008. godine i
- drugi međunarodni dokumenti,

2) Psihologija maloljetnika.

### **Član 3. (Svrha tematskih ciklusa)**

U okviru tematskih ciklusa posebno se kroz predavanja obrađuju položaj maloljetnika kao učinioca krivičnog djela, a posebno položaj djece i maloljetnika kao lica oštećenih krivičnim djelom.

### **Član 4. (Sticanje sertifikata)**

- (1) Polaznici specijalizacije po završetku svakog tematskog ciklusa dobijaju potvrde o učešću, koje su uslov za sticanje sertifikata o završetku edukacije.
- (2) Sertifikaciju polaznika specijalizacije vrši Pravosudna komisija Brčko distrikta BiH u saradnji sa Entitetskim centrima za edukaciju sudija i tužilaca.
- (3) Pravosudna komisija Brčko distrikta BiH i entitetski centri za edukaciju sudija i tužilaca vode posebnu evidenciju polaznika specijalizacije koji imaju sertifikat.

### **Član 5. (Cilj edukacije)**

Osim upoznavanja polaznika specijalizacije sa sadržajem Zakona, njegovim novinama i standardima, Program edukacije ima posebno za cilj:

- a) podizanje svijesti u široj i stručnoj javnosti radi promocije i zaštite prava djece u sukobu sa zakonom, te dubljeg sagledavanja korišćenja tih prava,
- b) razvoj i primjenu maloljetničkog pravosuđa u cilju što adekvatnijeg rada sa maloljetnicima i podizanje nivoa kvaliteta rada sistema maloljetničkog pravosuđa i
- c) razvijanje potencijala sistema maloljetničkog pravosuđa, socijalnog sektora, te zaposlenih u ustanovama sistema koji rade sa ovom populacijom kako bi se stvorio jedan cjelovit, moderan i zaokružen sistem maloljetničkog pravosuđa.

**Član 6.**  
**(Dinamika realizacije programa edukacije)**

Dinamika realizacije Programa edukacije na seminarima, kao i teritorijalna raspoređenost seminara vrši se na osnovu broja polaznika za svaki tematski ciklus.

**DIO TREĆI - ZAVRŠNE ODREDBE**

**Član 7.**  
**(Stupanje na snagu)**

Ovaj program stupa na snagu danom usvajanja i objaviće se u Službenom glasniku Brčko distrikta BiH.

Broj: SuPK-1263/12  
Brčko, 29.10.2012. godine.

**Predsjednik**  
**Pravosudne komisije**

**Safet Pizović**